

# Powšitkowne WOZJEWJENJA

njedźelu, 7. februara 2021

## Wusyłanje Božemu mšow

Serbskorěčnu Božu mšu móža wěriwi tutu njedźelu, 7. februar, znowa jako live-stream w interneće scěhować. Dopoldnja w 9 hodź. přenjese so wona z Chróšćanskeje, dalša hižo we 8.30 hodź. z Kulowskeje cyrkwy. Linkaj stej na internetowej stronje [www.posol.de](http://www.posol.de) wozjewjenej.

## Dwurěčna Boža mša w radiju

„Rozhłosowy scelak MDR-Kultur přenjese njedźelu, 14. februara, Božu mšu ze serbskim podžělom z Budyskeje cyrkwy Našeje lubeje knjenje. Kemše započnu so w 10 hodź.

## Swěčku postajić

„Stajimy swětło do wokna. Swětło žarowanja, swětło sobuželnosće, swětło sobučuća.“ Z tutymi słowami pozbudža němski zwjazkowy prezident Frank-Walter Steinmeier, wječor – wosebje pjatk – zaswěcenu swěčku do wokna stajić a z tym na zemrětych koronoweje pandemije kaž tež na jich žarowacych přiwuznych spominać. Towarstwo Cyrila a Metoda z.t. so tutej namołwje přizamknje a prosy, zo by ju telko ludźi, kelkož móžno scěhowało, zdobom pak so za potrjechenych pomodliło.

## Mandźelski seminar

Seminaraj k přirotej na sakrament mandźelstwa wotmějetej so wot pjatka do soboty, 19. do 20. měrca, kaž tež wot 16. do 17. apryla, w Smochčanskim kubłanišću swjateho Bena. Přizjewjenja přijimuju so hač do pónđzele, 1. měrca, jeničce online na internetowej stronje dekanatneho dušepastyrstwa. Link k wotpowědnemu formularaj a k dalšim pokiwwam je pod [www.posol.de](http://www.posol.de) podaty.

## Zawod do džěła pastoralnych gremijow

Džěło wosadnych pastoralnych gremijow steji w srjedźišću dweju zarjadowanjaw, na kotrejž přeprošuje pastoralny wotrjad Drježdźansko-Mišnjanskeho biskopstwa. Wonej wotmějetej so wutoru, 2. a 9. měrca, stajnje wot 19.30 do 21.00 hodź. digitalnje přez Zoom. Nimo wuměny nazhonjenjaw přěnich zetkanjaw dóstanu wobdźělnicy praktiske pokiwy k džělu z nowymi porjadami pastoralnych gremijow kaž tež k wašnju džěła a tworjenju rozsudow. Swoje prašenja měli wobdźělnicy hižo do toho zapodać, na kotrejž jim potom wotmołwja. Zajimcy měli so přez přizjewjenski system Eveeno přizjewić. Link na njón je pod [www.posol.de](http://www.posol.de) podaty.

## Wobsah 2020

Wobsah Katolskeho Posoła lěta 2020 je dozestajany. Wšitcy, kotřiž chcedža sej lětnik zwjazać dać a wobsah sobu zapřijeć, móža sej dataju w formaće pdf z internetoweje strony [www.posol.de](http://www.posol.de) wučišćeć. Štóž tule móžnosć nima, njech wobroći so na redakciju Katolskeho Posoła w Budyskim Serbskim domje pod telefonowym čisłom (0 35 91) 55 02 12.

## **Digitalna rozmołwa k prašenjam wěry a žiwjenja**

Na duchownu wuměnu k aktualnym prašenjam wěry a žiwjenja přepróšuje pastoralny wotrjad Drježdžansko-Mišnjanskeho biskopstwa. Wona wotměje so jónu měsachnje digitalnje přez platformu Zoom. Kóžde zetkanje steji pod wěstym hesłom a zahaji so z krótkim zawodom do wotpowědneje temy. Přěnja tajka rozmołwa budže pónđzelu, 22. februara, pod temu „Ze svojim Bohom přeskoču murje. Abo nic?“. Zajimcy měli so přez system Eveeno přizjewić. Link je pod [www.posol.de](http://www.posol.de) wozjewjeny.

## **Wo wolontariat so požadać**

Na katolskej žurnalistiskej šuli ifp zahaji so nazymu nowy wukubłanski lětnik za přichodnych žurnalistow. We wobłuku dwulětneho wolontariata nawuknu zajimcy zakłady žurnalizma za džěło w rozhłosowych, telewizijnych a nowinskich redakcijach kaž tež na polu digitalnych medijow. Džěl wukubłanja absolwuja wolontarojo w katolskich redakcijach na wšelakich městnach Němskeje. Požadanja přijimuju so hač do 1. měrca 2021. Link je pod [www.posol.de](http://www.posol.de) wozjewjeny.